

---

---

**ԳԻՏԱԿԱՆ ՆՍՏԱՇՐՋԱՆՆԵՐԻ ՆՎԻՐՎԱԾ ՀԱՅ  
ԺՈՂՈՎՐԴԱԿԱՆ ՄՇԱԿՈՒՅԹԻՆ**

*2013 թ. դեկտեմբերի 17-ից 18-ը ՀՀ ԳԱԱ հնագիտության և ազգագրության ինստիտուտում կայացավ արդեն ավանդական՝ «Հայ ժողովրդական մշակույթ 16» գիտական նստաշրջանը՝ նվիրված ազգագրագետ Դերեն Վարդումյանի ծննդյան 90-ամյակին:*

*Առաջին նիստը, որը վարում էր ինստիտուտի արդիականության ազգագրության բաժնի վարիչ, ՀՀ ԳԱԱ թղթակից անդամ Լ. Աբրահամյանը, սկսվեց հնագիտության և ազգագրության ինստիտուտի տնօրեն Պ. Ավետիսյանի բացման խոսքով, որից հետո ինստիտուտի ազգագրության բաժնի վարիչ Ս. Հոբոսյանը ներկայացրեց Դերեն Վարդումյանին որպես անձ և գիտնական՝ մասնավորապես նշելով նրա կարևոր ներդրումը հայ ազգագրագիտության զարգացման գործում:*

*Գիտական նստաշրջանին ներկայացվել էր 54 զեկուցում, որից ընթերցվեցին ստորև բերված զեկուցումները:*

*Լ. Վարդանյանի զեկուցումը նվիրված էր Լոռու ազգագրության ուսումնասիրությանը 1930-ական թվականներին, որը հիմնված էր այդ տարիներին Լոռուց գրաված ազգագրական նյութերի վրա: Ա. Վարդանյանի զեկուցումը Քոթանիայի հայ համայնքի երաժշտության մասին էր, որտեղ հիմնականում հետազոտվում էր այս կողմերից Կոմիտասի գրառած հայատառ թուրքերեն երգերը: Ս. Վարդանյանը և Հ. Մարգարյանը զեկուցեցին «Քրդախոս սիրիահայերի բանահյուսական և ազգագրական ավանդույթները» թեմայով՝ հիմնվելով 2010 թվ. Արմավիրի մարզից հավաքած դաշտային հետազոտությունների վրա: Ուսումնասիրության մեջ մեծ տեղ էր հատկացված հատկապես սիրիահայերի ժողովրդական բանավոր ավանդությանը: Ա. Ամիրխանյանի զեկուցումը նվիրված էր լոռեցիների հավաքչական գործունեության մեջ սնկի ունեցած դերին և դրանց ժողովրդական ընկալումներին: Ա. Դաբաղյանի զեկուցման թեման էր «Արցախի և Սյունիքի ճանապարհները XIX–XX դդ., մշակութային և աշխարհագրական առումները», որտեղ պատմական տարբեր աղբյուրների (ժամանակի գիտական աշխատություններ, քարտեզներ, ճանապարհորդների հուշեր) միջոցով ցույց էր տալիս, թե ինչպիսի կարևորություն են ունեցել հարավկովկասյան տարածաշրջանի համար Արցախով ու Սյունիքով անցնող ճանապարհները:*

*Դեկտեմբերի 17-ի 2-րդ նիստը ղեկավարում էր պատմական գիտությունների դոկտոր Լ. Վարդանյանը: Առաջին զեկուցումը ներկայացրեց Հ. Խառատյանը՝ այժմյան Դերսիմի տարածքում ալեվիների կամ զազա-ալեվիների ինքնության փնտրտուքը և նրանց մի մասի հայկական արմատների հարցը թեմայով: Գ. Ստեփանյանի զեկուցումը նվիրված էր «տան սրբերի» պաշտամուն-*

քին. նա ներկայացրեց, թե ինչպիսի հրաշքների շնորհիվ են «տան սրբերը» հայտնվում տան անդամերին:

Չո. Ասատրյանը և Ն. Շամամյանը ներկայացրեցին ««Թելի» խորհուրդը հայոց ավադական ճամփու պարերում և խաղերում» զեկուցումը: Հեղինակները փորձել էին ցույց տալ, թե խորհրդանշական ինչպիսի դեր ունի թելը և կծիկը ժողովրդական բանահյուսության մեջ: Ա. Հակոբյանի «Տարածք, հիշողություն և ինքնություն ՀՀ Ջյունաշող գյուղի փախստական վերաբնակների օրինակով» խորագիրը կրող զեկուցումը պատմական հիշողությունների քննություն էր:

Դեկտեմբերի 18-ի առաջին նիստը բացվեց Ս. Վարդանյանի զեկուցումով, որի թեման էր «Հայոց ցեղասպանության մասին գրառումներ կրոնափոխ համշենահայերից»: Հեղինակը դաշտային նյութերի հիման վրա ցույց տվեց, թե ինչպես են համշենահայերը տեղահանվել XX դարասկզբին՝ բերելով նաև մասնավոր պատմություններ և հիշողություններ: Ս. Մկրտչյանի զեկուցումը նվիրված էր Վրաստանում տարրական դասարաններում պարերի միջոցով ազգային խորհրդանիշների ստեղծմանը և դրա պրոպագանդանը՝ «Պարը և արվեստը, որպես ազգային ինքնություն ձևավորող գործիք (Վրաստանում տարրական դպրոցի ուսումնական ծրագրերի և դասագրքերի օրինակով, 2010–2011 թթ.) վերնագրով»: Երիտասարդ գիտաշխատող Հ. Մելքոնյանը հանդես եկավ «Բդեալական հայրենիք» ազգայնության դիսկուրսը զբոսաշրջային արվեստում» զեկուցումով, որում խնդիրը քննել էր զբոսաշրջային մշակույթի համատեքստում՝ բերելով բազմաթիվ օրինակներ: Գ. Աղանյանը զեկուցում կարդաց «Լոթիության դրսևորումները Ալեքսանդրապոլում» թեմայով:

Այդ օրվա գիտական նստաշրջանի 2-րդ նիստի զեկուցումները վերաբերում էին բանագիտական հետազոտություններին: Նիստավար Թ. Հայրապետյանի (բանահյուսության տեքստաբանության բաժնի վարիչ) ելույթը վերաբերում էր հայ ժողովրդական հեքիաթների սյուժեների ու տիպերի համացույցի նախնական տարբերակին (ըստ Աարնե-Թոմփսոն-Ութերի հեքիաթների միջազգային նշանակի)՝ ներկայացնելով նախ «միջազգային հեքիաթների տեսակները» եռամաս նշանակը, ապա հայկական հեքիաթների տիպերի նշանակների խմբագրման և համալրման աշխատանքները:

Ե. Զաքարյանը, շարունակելով հեքիաթների թեման, ներկայացրեց «Հեքիաթի հերոսի հրաշալի օգնականը և հայոց հարսանիքի քավորը» խորագրով զեկուցումը: Լ. Ղուկասյանը ներկայացրեց ժողովրդական ասույթաբանության և ավանդական զրույցների կապը համանուն վերնագրով զեկուցումը: Ա. Սարգսյանի զեկուցումը հայ ժողովրդական երգիծական մանրապատումների կապը առակի, ավանդազրույցի և աղոթքի տեսակների մասին էր: Հաջորդ երեք հեղինակները զեկուցումներով անդրադարձան աղվեսի, գայլի և շան կերպարներին: Լ. Մկրտումյանը ներկայացրեց հնուց եկող աղվեսի երբեմնի պաշտամունքը, աղվեսի կերպարի երկակի բնույթը, նրա աղերսները պտղաբերության հետ և, վերջապես, աղվեսի կերպարի տրիքստերային գիծը հայկական հեքիաթներում: Լ. Սահակյանի ներկայացրած զեկուցումը բացահայտում էր գայլի պաշտամունքը, մասնավորապես, այն, որ գայլը մի շարք ժողովուրդների առասպելներում հանդես է գալիս որպես ծիսական ու հմայական պաշտամունքային կենդանի, որի շուրջ հյուսվել են բազմաթիվ ավանդազրույցներ:

Ա. Իսրայելյանը ներկայացրեց շան հմայական գործառնությունները հայոց հավատալիքներում: Ք. Այվազյանը հանդես եկավ «Մեղքի մասին պատկերացումները հայկական հեքիաթներում» վերնագիրը կրող զեկուցմամբ, որտեղ հայ ժողովրդական հեքիաթներից առանձնացրել էր այն մոտիվները, որոնց հիման վրա ցույց էր տալիս մարդուն բնորոշ մեղանշելու իրողությունները:

Ընթերցված զեկուցումների շուրջ ծավալվեցին բովանդակալից քննարկումներ:

Նիստն ամփոփեց բանագետ, ինստիտուտի բանահյուսության տեսության և պատմության բաժնի վարիչ, ՀՀ ԳԱԱ թղթակից անդամ Ս. Հարությունյանը: Նախ նա ներկայացրեց Դերեն Վարդումյանի գիտակազմակերպչական աշխատանքների հիմնական արդյունքները հայ ազգագրության բնագավառում, ապա կարդացված զեկուցումների կապակցությամբ կատարեց երկու ընդհանրացված դիտողություն: Առաջինն այն էր, որ երիտասարդ գիտաշխատողներին խորհուրդ տվեց հետազոտվող խնդիրների առնչությամբ հենվել դասական հեղինակների ձեռք բերած և մասնանշած ցուցումների վրա, նաև հաշվի առնել նորագույն հետազոտողների ստեղծած գիտական արդյունքները, իսկ մյուսն այն էր, որ ժողովրդական առակախոսների՝ Պոլոզ Մուկուճ, Կիրովականցի Ռուբեն, Ծիտրո Ալեք, Ջդեր Խաչիկ և այլ անուններով հասած զրույցները հետազոտելիս միշտ նկատի ունենան բանագիտական այն ընդհանուր սկզբունքը, որ այդ կերպարները նույնությամբ չեն արտացոլել նրանց նախատիպերի պատմականությունը, այլ ստեղծվել են վիպական բանահյուսության յուրահատուկ իդեալականացման և չափազանցեցման ընդհանուր օրինաչափություններով:

Վերջում նշենք, որ Լևոն Աբրահամյանի և Սուրեն Հոբոսյանի խմբագրությամբ արդեն իսկ լույս են տեսել «Հայ ժողովրդական մշակույթ 16» թեմայով գիտական նստաշրջանի զեկուցումները՝ «Ավանդականը և արդիականը» ընդհանուր խորագրով:

ԱՆՆԱ ՊՈՂՈՍՅԱՆ,  
ՍՄԲԱՏ ՀԱԿՈԲՅԱՆ